

**adr-**

ALTERNATIV DEMOKRATESCH  
REFORMPARTEI

# de pefferkär

## D'Alternativ fir Beetebuerg

### Gemengewalen 2017

Lëscht 5

#### Firwat sollt Dir e Sonndeg d'ADR wielen?

D'ADR ass eng sozial engagéiert Partei, déi d'Wärter, d'Kultur an d'Sprooch vum Lëtzebuurger Land vertritt a verdeedegt. Mir maachen eis staark dofir, datt eis Lëtzebuurger Traditiounen an eis Manéier mateneen ze liewen dem Land a senge Bierger erhale bleiwen. Net nëmmen um nationalen Niveau, mee och um kommunalen, triede mir a fir d'Rechter vum Eenzen an de Respekt vun der Demokratie.

Eng gutt Gemengeféierung këmmert sech ëm d'Sécherheet an d'Biergerbedeelegung. D'ADR setzt sech a fir passend Sécherheitsmoossnamen an all Gemeng. Mir ginn eis net zefridden, bis all Mënsch sech hei am Land nees sécher fillt a séch iwwerall ouni Angscht beweegen kann, an dëst och zu spéider Stonn. A punkto Biergerbedeelegung fanne mir et méi wéi traureg, datt bis elo Gemengepolitik dacks iwwert d'Käpp vun de Leit ewech gemaach gouf.

D'ADR wëllt d'Gemengen zesumme mat hiren Awunner gestalten, an als hir Verrieder d'Gemeng geréieren, amplaz ze dirigéieren.

**ADR an  
der Gemeng:  
zesumme mat den  
Awunner!**

Aus dësem Grond fuerdert d'ADR kloer de Referendum op kommunalem Niveau a mécht sech staark géint Korruptioun a Vaternwirtschaft an der Politik. Zesumme mat den Awunner wëlle mir eng Gemeng schafen an erhalen, déi net just bewunnbar ass, mee och déi néideg Liewensqualitéit bitt. Dëst mat engem Wunnraum, deen d'Leit sech leeschte kënnen, ouni dofir mussen u Liewensqualitéit anzéissen.

D'ADR mécht Politik, déi sech no de Bedierfnesser vun de Leit richt an net ëmgedrënt. Mir sinn dofir fir eng realistesch an effizient Ëmweltpolitik, déi net duerch realitéitsfrem Normen a Virschreften de Leit an der Gemeng d'Bezuele vu Wunnraum onméiglech mécht. D'ADR wäert beim Erhale vu wäertvoller Bausubstanz hëllefen, an net d'Renovéieren an d'Baue mat iwwerspëtzte Reglementer onméiglech maachen. D'ADR mécht Politik fir d'Leit a mat de Leit.

Weider nach wëlle mir verhënneren, datt de Staat iwwert de Käpp vun de Gemengen ewech Entscheedungen trifft, mat deenen d'Gemengen an hir Awunner direkt konfrontéiert sinn. Sou wäerte mir

et net hinhuelen, datt de Staat, ouni der Gemeng an hiren Awunner hiert Zoustëmmen, e Flüchtlingsfoyer an der Gemeng ariicht.

Mir als ADR maachen eng kanner- a familjefrëndlech Gemengepolitik. Mir fërderen héichwäerteg Crëchen, fuerderen awer, datt d'Elteren och ëmmer d'Méiglechkeet hunn, hir Kanner mat der néideger Zäit an Opmierksamkeet doheem erzéien ze kënnen. Mir sti fir eng Gemengeféierung, déi maximal sozial ass, bei där kee Mënsch vergiess gëtt, och net eis eeler Matbierger, déi mat Krankheet oder Behënnerung.

**Finanzen:  
kompetent a  
sozial verwalt!**

D'ADR wäert sech dofir staark maachen, datt d'Gemengefinanze kompetent, sozial a mat Verstand gereegelt ginn. Da kënnt et net zu deenen onnëtzten an onsozialen Erhéijunge vun Taxen. Bestoend Taxe wäerte mir no soziale Kritären upassen, sou datt et hei eng méi gerecht Verdeelung wäert ginn. Deementspriedend géinge mir dofir suergen, datt d'Waassertax sozial berechent gëtt.

Sou hätt all Awunner pro Joer e gratis Waassersockel op de Kapp zegutt, an duerno gëtt de Waasserverbrauch mat enger progressiv gestaffelter Tax berechent. Domat hätt all Bierger säin néidege Grondverbrauch u Waasser ofgedeckt – schliisslech handelt et sech hei ëm e mënschlecht Grondbedierfnes. Esou eng progressiv Präisstaffelung géng awer gläichzäiteg verhënneren, datt déi liewenswichtig Ëmweltressource ouni nozedenke géng verbëtzt ginn.

**ADR:  
jonk a  
couragéiert**

D'ADR ass eng jonk a couragéiert Partei, déi hir Iddien net just a schéine Sonndesriede versprécht, mee och wierklech duerchsetzt a sech

honnertprozenteg fir hir Gemeng asetzt.

Duerfir:

**Den 8. Oktober all Stëmm fir d'ADR. Fir eng besser Gemeng. ADR – déi richtig Alternativ!**



#### Inhaltsverzeechnes

Firwat sollt Dir e Sonndeg d'ADR wielen?

**Säit 1**

Gratis ëffentlechen Transport a keng Autos-Schikanen

Beim Zuch- a Busabonnement hëllefen ...

Politesch Schäinhellegkeet an der Wuesstems-fal

**Säit 2**

Fir datt all Bierger a senger Gemeng ka matschwätzen!

Bezuelbare Wunnraum mat Kapp a Verstand!

6 Prioritéite fir eis Gemeng

Richtig wielen!

**Säit 3**

Ëffentlech Sécherheet ass Sécherheet fir Jiddereen!

Historesch an architektonesch Schätz fleegen!

[Member-Formular](#)

**Säit 4**

30 Fudder Waasser gratis op de Kapp géint deier „gréng“ Gemengepolitik  
D'Regierung reift sech d'Hänn!

**Säit 5**

De Rettungsdéngscht a sécher Gebaier ...  
Wat sinn d'Alternative fir Är Gemeng?

Eng jugendlech Gemeng

Schluddregkeeten an der Gemeng

**Säit 6**

Ondemokratesche Schäfferot suergt fir Wal-skandal

Een neie Flair fir Beetebuerg

Eise Kommentar

Eng Gemengefal um Trëttoir

**Säit 7**

[Eis Kandidate fir Är Gemeng](#)

**Säit 8**



## Beim Zuch- a Busabonnement hëllefen ...

Mir fuerderen, datt den ëffentlechen Transport gratis gëtt. Esou laang dat net de Fall ass, soll sécher gestallt sinn, datt déi Leit, déi sech net esou gutt stinn, esou mann wéi méiglech fir Zuch a Bus bezuelen.

Fir si ass ee Joresabonnement e ganz deiert Investissement. Dat ass awer 160 Euro méi bëlleg wéi 12 Mount-Aboën. Dofir wäert all Gemeng, wou d'ADR eppes ze soen huet, d'Jores-Abonnement finanzéieren hëllefen. Et kann da kamoud am Laf vum Joer zrëckbezuelt ginn ...

## Politesch Schänhellegkeet an der Wuesstemsfal

Wat kloen eis Gemeengepolitiker zu Beetebuerg an och an aner Uertschaften! A wat stëmmen si an der Chamber äifreg fir eng Politik, déi de gréissten Deel vun deene Problemer ausléist!

Anescht wéi aner Länner wüsst d'Wirtschaft zu Lëtzebuerg och a Krisenzäiten. Dat ass eent vun den Haaptziler vun der Lëtzebuerger Politik, en Zil, dat een awer méi genee misst ënnert d'Lupp huelen.

Esouguer a Kriisjoren ginn zu Lëtzebuerg nach eng 10.000 Aarbechtsplaze geschaf, a bei véier Prozent Wirtschaftswuesstem sinn et der gutt 15.000.

De Gros vun deene Aarbechtsplaze gëtt vu Grenzgänger besat, well hei am Land anscheinend déi néideg Qualifikatiounen feelen. 80 Prozent vun de Grenzgänger komme mam Auto op hir Aarbecht, well den ëffentlechen Transport net déi néideg Kapazitéiten huet oder well si net mam ëffentlechen Transport vun doheem op hir Aarbecht kommen. Dat mécht am Schnëtt ronn 8.000 zousätzlech Autote pro Joer aus. Een Auto bedeit sechs Meter am Stau. An anere Wieder gëtt eist Stroossenetz mat 8.000 Autoen mat bal 50 Kilometer Stau weider beaascht - iwwer den Dag verdeelt.

Wa mer eng Politik maachen vu weiderem stramme Wuesstem gëtt de Verkéierschaos vun Dag zu Dag méi grouss an déi eenzel Stied an Uertschaften mat Autoslawinen erstéckt.

Genausou verhält et sech mat der Wunnengsproblematik. Wa mir esou vill Aarbechtsplaze schaaften an d'Leit all Dag am Stau stinn, ass et eng logesch Konsequenz, datt déi méi no bei hir Aarbecht wëlle wunne kommen. Duerfir gëtt den Drock op de Wunnengsmaart vu Joer zu Joer méi grouss, an d'Präisser, wéi an de leschte Joeren, praktesch ëm 5 Prozent pro Joer klammen.

Net nëmme ginn duerch Industriezonen d'Wisen zoubetonéiert, mee dës Politik dréit och nach zu engem zousätzlechen Verkéiersopkomme bäi. Mat dëser Politik wäert an de nächste Joeren am Raum Beetebuerg-Diddeleng de Verkéierschaos vun Dag zu Dag méi grouss ginn.

Schänhelleg ass et duerfir, wann d'Parteipolitiker vu Beetebuerg an Diddeleng versichen, sech de schéine Männchen bei hire Bierger ze maachen, a sech opreegen iwwer de Verkéierschaos, deen Dag fir Dag an dësen Uertschaften méi grouss gëtt.

Et sinn awer déi nämmelech Politiker, déi op Gemeengeplang matdecidéiert hunn, déi Industriezonen do ze implantéieren an op nationalem Plang als Deputéierten d'Politik vun engem maximale Wuesstem blannemännchen ënnerstëtzen.

## Gratis ëffentlechen Transport a keng Autos-Schikanen



Parkproblem a Parkmoral zu Beetebuerg: D'ADR wëll seriö Kontrollen.

De Verkéier zu Lëtzebuerg gëtt ëmmer méi schlémm. D'Gemeng muss e sécher a gläichberechtigt Matenee vun alle Leit am Verkéier garantéieren.

D'ADR huet eng kloer Linn a Saachen ëffentlechen Transport

- Mir trieden a fir gratis ëffentlechen Transport fir jiddereen.
- Gemengenefferten fir den ëffentlechen Transport musse vum Stat ënnerstëtzt ginn.
- Den Tram ass keng Léisung vum Verkéiersproblem a mir si géint d'Ubanne vu weideren Uertschaften.
- Gemenge solle sech esou effikass wéi méiglech a regionale Reseauen verbannen, dat an enker Ofsprooch mat den Awunner. All Mënsch muss och no der Owes-Virstellung am Kino (also bis Hallefnuecht) nach gutt mam ëffentlechen Transport heem kommen. An ab 9 Auer mueres soll ee Bus schonn de Beetebuerger Park ufueren.
- Fir eng Gemeng mat esouvill Uertschaften ass e City-Bus kee Mutwëll. Wou bleift esou eng Léisung an dëser soi-disant grénger Gemeng? D'Awunner sollen och iwwer d'Zuel an d'Plaz vun den Haltestellen an och iwwer d'Organisatioun vum Schoultransport kënne matschwätzen.
- Iwwerwachungskameraen an de Bussen an den Zich maachen den ëffentlechen Transport méi sécher.
- Individualverkéier muss eng Wiel bleiwen.

Dräi Véirel vun den Trajeten am Land gi mam privaten Auto gemaach. Et ass net un enger Gemeng oder um Stat, dës private Choix ze kontestéieren oder ze beaflossen.

D'ADR ass géint Schikanen fir Autofuerer (iwwerdriwwen Verkéiersberouegung, kënschtlech

**Individual-  
verkéier bleift  
eng Wiel fir de  
Bierger!**

Verknappung an Iwwer-  
deierung vu Park-  
méiglechkeeten,  
ze knappe Par-  
king résiden-  
tiel, ze peni-  
bel Kontroll  
vu Parkziedelen  
op d'Sekonn ...).

Null Toleranz erwaart deen Automobilist, deen ze séier an der Uertschaft ass, récksiichtslos parkt oder nuets onnéideg Kaméidi mam Auto mécht.

Null Toleranz gëllt fir Foussgänger a Vëloen, déi sech net un d'Verkéiersregelen halen.

Onnéideg geféierlech Situatiounen (Bus- oder Vëlosspueren a Géigerichtung an Einbahnstroossen, Vëlosspueren op Trëttoiren an a Foussgängerzonen ...) wäert d'ADR net bestoe loosse.

E besonnesch penible Problem sinn a bleiwe fir den Autofuerer déi

Näerzenger Barriären. D'ADR fuerdert hei endlech Léisungen.

Fir Beetebuerg fuerdere mir och eng besser Parkzäitregelung fir Behënnerteparkplazen an och bei de Kierfechter.

Virun allem wëlle mir strikt Verkéierskontrollen, besonnesch och vun de Schwéiertransporter, déi duerch Beetebuerg fueren.

Mir garantéieren

- en Ausnotze vum ganze méiglechen Parkraum vun der Uertschaft
- eng Reglementéierung vum Parke vu Betriebs-camionnetten ausserhalb vu Wunnzonen;
- flëssende Verkéier op den Haaptverkéiersachsen an d'Uertschaft an aus der Uertschaft mat, wann néideg, entsprecheende Contournementen;
- verkéiersberouegt Wunnquartieren;
- gudd Stroosseninfrastruktur a gutt Verkéiersweeër, an dat och fir Foussgänger a Vëlofuerer.

De Vëlo ass an deene meeschte Fäll méi e Sport a Fräizäitgefier wéi e Fortbewegungsmëttel fir schaffen oder akafen ze fueren. Deementspreechend sollte Vëlospisten och méi regional an touristesch gesinn an ausgebaut ginn. Mäer denken un d'Strecke Näerzeng-Keel a Näerzeng-Lameschmiller, mee och u Weer tëscht Obler, Beetebuerg a Fenneng.


Vëlosservicer, wéi si a verschiddenen Uertschaften bestinn, géinge vun eis op hiren Notzen an hir Käschte gepréift ginn. Och de Sécherheetsrisiko duerch ongeübte Vëlofuerer, de récksiichtslosen Asaz a Foussgängerzonen, d'Benotze vum Vëlo als Spillsaach an de Vandalismus, deem dës Gefierer ausgesat sinn, sollen ënnersicht ginn.



Fir wéini eng Léisung fir d'Näerzenger Barriären?



## Fir datt all Bierger a senger Gemeng ka matschwätzen!



Internet erliichtert d'Liewen, mee vill Leit brauchen och de mënschleche Kontakt an Hëllef mat Formulieren.

D'politescht Matsproocherecht vum eenzele Bierger ass fir d'ADR ganz wichteg. Mir stinn dofir an, datt déi direkt politesch Bedeelegung an d'Transparenz an der Gemeng erhalen a weider ausgebaut gëtt, andeems:

- de lokale Referendum mat vereinfachte Modalitéiten erméiglecht gëtt
- d'Bierger gutt a korrekt informéiert ginn, ënner anerem duerch:
  - ◊ d'Internetiwwerdroung an d'Archiviere vu Gemengerotsätzungen
  - ◊ objektiv a politesch neutral Berichter vun de Gemengesätzungen fir all Stot an dat net eréischt Méint no der Sëtzung
  - ◊ ëffentlech Informatiounsversammlunge viru grousser Projeten a wichtege

gegen Entscheidungen

- ◊ e lokalen Televisiounskanal vun der Gemeng iwwer Kabel-TV an/oder Internet

Der ADR no muss den Déngscht um Bierger fir d'Gemeng un éischter Plaz stoen. Dowéinst këmmere mir eis dorëm, datt d'Gemeng

- Verwaltungsweeër esou einfach wéi méiglech mécht
- och baussent „normalen“ Bürosstoen fir dës Demarchen op ass
- och fir staatlech Verwaltung Biergerfroen entgéinnehuelen an dobäi berode kann
- méiglech vill Demarchen och iwwer Internet ubitt
- nieft dem online-Format ëmmer och d'Papierformat ubitt.

## Bezuelbare Wunnraum mat Kapp a Verstand!

Wat kann d'Gemeng maachen fir hiren Awunner genuch Wunnengen zu engem bezuelbare Präis ze bidden. Si huet zwou Zorte Klientel: Leit, déi genuch Mëttelen hunn, fir eng eege Wunneng ze finanzéieren oder ze lounen, a Leit, déi ganz reell finanziell Schwierigkeiten hunn, um Lëtzebuerger Wunnengsmaart an Daach iwwer dem Kapp ze fannen. Leit, déi an enger Gemeng lounen, sollte sech kënnen op eng gudd funktionéierend Loyerkommissioun verlossen, déi mat duerfir suert, datt si net ze deier bezuele müssen.

### Moosname fir Leit mat klengem Akommes

All Gemeng soll fir sech e gewësse Prozentsaz u gutt iwwer d'Quartiere verdeelte Sozialwunnengen festleeën fir keng "Ghettoen" ze schafen. Gemenge mat ville Sue kënnen an e Fong fir soziale Wunnengsbau investéieren.

- D'Prozedur fir eng sozial Wunneng zougedeelt ze kréien, muss transparent sinn, esou datt jiddereen ka wëssen, wéini him ka gehollef ginn.
- D'Gemeng soll hire Bierger awer och hëllef Proprietär ze ginn, z.B. mat Bankgarantien.
- "Portage foncier" ass besser wéi "Bail emphytéotique". Beim Portage gëtt de Bauterrain fir e symbolesche Betrag gelount, de Kafpräis erfällt no e puer Joer, wann zum Beispill de Bau vum Haus bezuelt ass.

Bei gréissere Projeten am soziale Wunnengsbau soll en Deel Wunnengen fir Leit reservéiert sinn, déi net genuch verdéngen, fir eleng ze bauen, awer zevill, fir vum Stat gehollef ze kréien.

### Moosname fir Leit, déi bauen oder kafen

- D'Bauufuerderungen dierfen de Präis vum Bau net iwwerdriwwen an den Himmel dreiwen. Eng Gemeng dierf net den Haustyp (Passivhaus) bestëmmen.
- D'ADR ass géint staatlechen Zwang an Amëschen a privat Affären: Dat gelt och fir d'Virkaufsrecht vun der Gemeng, fir Baulücken an eidel Wunnengen. Proprietären dierfen vun hirer Gemeng net gediengelt ginn mä si sollen iwwerzeegt ginn.
- Verkeeft eng Gemeng hir eegen Terrainen um fräie Wunnengsmaart, dierf si net Maartpräiser froen. Si muss hëllef, de Präis vum Bauland bezuelbar ze maachen.

Dat traditionellt Lëtzebuerger Bild vum eegenen Eefamilljenhaus ass fir vill Leit net méi ze bezuelen. Dat wäert de Charakter vun eisen Uertschaften änneren. D'Gemeng muss awer oppassen, datt hire Charakter net vëlleg entstallt gëtt. Si muss kucken fir ënner dem Bevëlkerungsdruck natierlech ze wuessen a weider Liewensqualitéit ze bidden. Si dierf net zur Schlofgemeng oder zur Wunnsiddlung ouni Séil ginn.

## 6 Prioritéite fir eis Gemeng

1. Bezuelbaart Wunnen: D'ADR huet konkret Solutiounen fir d'Gemeng!
2. Ëffentlech Sécherheet heescht Sécherheet fir jiddereen: Eis Gemeng brauche méi Police.
3. Mobilitéit ouni Dirigismus: D'Gemeng organiséiert de Matenee vun Auto, Foussgänger a Vélo. Si mécht net de Choix vum Verkéiersmëttel.
4. Famillje mat Kanner beschméiglech ënnerstëtzen: Mir brauchen Uertschaften, wou Kanner sech kënnen wuelfillen an entfalten.
5. D'Lëtzebuerger Sprooch als wichtegst Mëttel zur Integratioun: Un der Gemeng ass et, eis Sprooch ze verbreedden.
6. Flüchtlingen ophuelen, mat Häerz awer OCH mat Verstand: D'Gemeng muss an dëser Fro matschwätzen an d'Decisiounen dierfen net iwwer d'Käpp vun de Bierger ewech geholl ginn.

**adr-**

A.D.R - Alternativ Demokratesch Reformpartei



Ahles Fernand		
Blasen Edouard		
Eisenlöffel Guy		
Feltz Micheline		
Flammang Pascal		
Hermann Fabrice		
Klein Klaus		
Koehler Camille		
Koehler Pierrette		
Kohn Patrick		
Kopp Pierre, dit Pit		
Schneider Gérard		
Stehmeier-Ruppert Marianne		
Stirn Tanja		
Storck Stéphanie		

## Richtig wielen!

Där wëllt der ADR bei dëse Gemengewalen esou gutt wéi méiglech hëllef? Eise Walsystem erlaabt lech dat op zwou Manéieren:

Am einfachsten a séchersten ass et, de Krees iwwer der ADR-Lëscht schwartz ze maachen. Esou stellt Där sécher, datt keng Stëmm fir d'ADR verluer geet. Dir hëllef allen ADR-Kandidate gläichermoossen.

Wann Där awer ee besser kennt oder besonnesch gutt fannt, kennt Där Ärem Wonschkandidat och zwou Stëmmen ginn. Duerno fänkt dann d'Ziele un: An de Kästchen hannert de Kandidaten kennt Dir am ganze 15 Kräizer verdeelen, dann hutt Där Äre Stëmmmaximum erreecht. De Krees dierft Där dann NET méi markéieren.



**Weider eng Gemengenaufgab: Erhalt a respektvollen Ëmgang mat kierchlecher Bausubstanz**

## Historesch an architektonesch Schätz fleegen!

Der ADR ass et wichteg, datt eng bestëmmte Liewensqualitéit an der Gemeng ginn ass. Dëst steet am direkten Zesammenhang domat, datt en Ëmfeld erhalten oder geschaf gëtt, an deem d'Leit sech kënnen wuelfillen. Dozou gehéiert och d'Erhale vun eiser traditioneller Bausubstanz a vum Charakter vun der Stied an Dierfer. Schliisslech ass dëst – nieft der Lëtzebuurger Sprooch – e wichtigen Aspekt vun eiser Identitéit.

Mir setzen eis dofir an, datt

- regional-typesch Gebaier a Bausubstanze mat kulturellem Wäert erhale ginn
- et kommunal Subside ginn, fir d'Renovatioun an d'Sanéierung
- d'Gemeng, wann néideg, wäertvoll Gebaier keeft, fir den Erhalt ze sécheren
- d'Bierger fir déi kulturell Schätz vun hirer Uertschaft sensibiliséiert ginn
- d'Gemeng dofir suergt, datt historesch Plazen net duerch onpassend Konstruktiounen verschampeléiert ginn
- mat kierchleche Bausubstanze verantwortungsvoll a respektvoll ëmgaange gëtt

## Ëffentlech Sécherheet ass Sécherheet fir Jiddereen!

All Mënsch huet e Recht drop, sech a sengem Land, senger Gemeng a sengem Heem sécher ze fillen! Dofir mussen de Stat an d'Gemeng enk zesummeschaffen. D'Gewiicht vun der Gemeng muss staark sinn, well si am nooste mam Bierger a Kontakt steet. Dofir setze mir eis dofir an, datt

- de Stat an d'Gemeng Hand an Hand schaffen
- Themen, wéi z.B. d'Burka-Verbuet, déi just national an eenheetlech kënnen gereegelt ginn, dierfen net op d'Gemengen ofgewänzt ginn
- d'Zesummenaarbecht tëscht der Gemeng an der Police méi enk gëtt.

Hei maache mir eis staark dofir, datt d'Gemeng:

- zesumme mat der Police an de Bierger e lokale Sécherheetsplang ausschafft, dee reegelméisseg op seng Efficacitéit iwwerpréift gëtt
- méi e groust Matsproocherecht bei der Police-präsenz huet

D'Police muss méi no bei de Bierger zeréck. Si soll méi eng grouss Präsenz um Terrain weisen an et dierf net zu rechtsfräien Zone kommen, wou d'Police net higeet. Dofir setze mir eis dofir an, datt

- d'Police déi néideg Moyenen (z.B. de Plazverweis) a genuch Leit huet, fir agéieren ze kënnen
- a méi onrouege Quartiere Kommissariater kommen, déi 24 op 24 Stonne besat a fir d'Bierger accessibel sinn
- d'Police, wann si et wënscht, adequat Lokaler vun der Gemeng zur Verfügung gestallt kritt
- op besonnesch sensibelen ëffentleche Plaze Kameraen installéiert ginn, awer ënner strengen Oplagen a mat Respekt virun der Privatsphär
- D'ADR Beetebuerg wäert duerfir suergen, datt een allzäit duerch d'Unterführung op der Gare ka goen, ouni ze fäerten

D'ADR wäert sech weiderhi fir d'Konzept vun enger Noperschaftspolice asetzen.

### Aarmut an organiséiert Heeschen

D'ADR suergt dofir, datt d'Gemeng effikass Méiglechkeete kritt, fir organiséiert Heescherei, sou wéi

aggressiivt Biedelen ze verbidden. D'fräit Zirkuliere vun den Bierger an Europa gëllt, wann dës genuch eege Mëttelen hunn, fir hir Existenz ofzesécheren. Dëst soll och um kommunale Plang agehale ginn. Fir dat ëmsetzen ze kënnen, mécht sech d'ADR staark, fir datt d'Police

- mat der Ënnerstëtzung vun der Justiz an eventuell vun der Douane, d'Moyene kritt, fir dat organiséiert Heeschen an de Grëff ze kréien
- gewësse Leit e Plazverweis ka ginn, woumat hinnen den Openthalt op bestëmmte Plazen verbuede gëtt
- dës Dispositioun net just bei organiséierten Heeschebanden oder bei aggressivem Biedelen uwendet kann, mee och géint aner Banden, kriminell Organisatiounen an Drogendealer virgoe kann.

Nëmmen esou Moosnamen an deen néidege gesetzelche Kader kënnen zu enger Verbesserung vun der ëffentlecher Sécherheet féieren.

Der Aarmut muss anescht entgéintgewierkt ginn, wéi Heeschen als e Mënscherecht ze deklaréieren. Fir d'ADR kann dëst keng Léisung sinn. Dofir ënnerstëtze mir – net just op nationalem, mee och op kommunalem Plang – datt Leit an Nout, déi e Recht hunn, hei am Land ze sinn, gehollef kréien. Als méiglech Moosnamen gesi mir vir, datt déi Betreffen

- en Ënnerdaach an en würdeg Liewen erméiglecht kréien, z.B. mat betreitem Wunnen, Nuetsfoyeren, Vollekskichen, Kaffis- an Téistuffen
- déi an enger spezieller Situatioun sinn, – Kopelen, Leit mat Kanner oder mat Hënn, asw. – géeeegent Léisunge musse proposéiert kréien
- och op kommunalem Plang vu besser koordinéierten zoustännegen Organisatiounen betreit ginn

Mat esou Moosname viséiere mir, d'Leit „déi op der Strooss liewen“ nees an d'Gesellschaft ze integréieren, mat enger Wunneng, enger Aarbecht, an enger reeller Liewensperspektiv.

----- ausschneiden an un ADR 20, rue de l'Eau L-1449 Lëtzebuerg schécken -----



**Gidd Member an der ADR, a frot och Aër Familljemembren a Frënn, fir Member ze ginn.**

De Joresbeitrag ass fir eng Persoun 14.-€, fir e Stot 20.-€, a fir Schüler a Studenten 5.-€

Numm & Virnumm: .....

Adress: .....

Telefon: .....

Email: .....

## de pefferkär

**Oplag: 4.200**

**Verantwortlech fir dëse**

**Pefferkär**

**fir d'Gemeng Beetebuerg ass**

**d'Alternativ Demokratesch**

**Reformpartei**

**22, rue de l'Eau**

**L-1449 Lëtzebuerg**

**www.adr.lu**



## 30 Fudder Waasser gratis op de Kapp géint deier „gréng“ Gemengepolitik

Schonn e komescht Gefill, wann ee mueres fréi d'Leit mat hire Grompereschiele gesäit ëm d'ëffentlech Dreckschëscht schläichen ... Dreck ass e richteg deiere Spaass ginn. A wie seng deier bezuelte Poubelle méi dacks virun d'Dier setzt, muss nach méi bezuelen. Duerfir entsuerge Leit hir Reschter ëmmer méi dacks an d'ëffentlech Dreckschëschten, déi dann och séier voll sinn, esou datt d'Leit net wësse wouhi mat deene Saachen, déi daags iwwer esou ewech ze geheie sinn, wann ee net doheem ass.

Gewosst ass, datt praktesch all zweet eleng erzéiend Mamm de Risiko huet, an d'Aarmut ze falen. Wéi kann esou eng Mamm mat zwee kleng Kanner an engem entsprecheende Verbrauch u Wëndelen iwwer d'Ronne kommen, wann eis Gemeng hir bei der Poubelles-Tax esou déif an d'Täsch fiert?

Un deem Beispill erkennt een, wéi ongerecht déi Gemengentaxe sinn. Si treffe jidfereen d'nämmlecht, deen, de sech et ka leeschten an esou Zommen aus dem Arm rëselt, awer och deen, deen all Mount Problemer huet, fir iwwer d'Ronnen ze kommen. Dat ass genee wéi d'TVA, déi och den Ënnerscheed net mécht, ob deen deen akeeft, räich oder arm ass. Dës Taxen treffe jiddereen d'nämmlecht, awer si dinn deenen enge méi wéi wéi deenen aneren.

Et war ni esou, datt d'Leit Problemer haten, fir d'Rechnunge vun der Gemeng ze bezuelen. Et ass awer esou, datt d'Taxepolitik an eng Richtung gaangen ass, datt d'Leit ëmmer méi déck Rechnunge kritt hunn. No enger grénger Iddi sollten d'Leit reell bezuelen, wat e

Gemengeservice kascht.

**Gréng  
wierkt ... op  
de Portmonni!**

Dat onofhängeg dovun, datt vill Gidder a Servicer, déi d'Gemeng eis verkeeft, jo net der Gemeng gehéiere mee ... och all deene Leit, déi et deier musse bezuelen.

Zum Beispill d'Waasser, wat ee fréier selwer un eng Quell siche gaangen ass. Parallel sinn ëmmer méi

streng Riichtwäerter festgesat ginn, déi d'Liwwerung vun extra propperem Waasser och ëmmer méi deier gemaach hunn. Allerdéngs ass d'Waasser och ëmmer méi belascht ginn a war méi schwéier drénkfäerdeg ze maachen. Dat war awer net d'Schold vun all Mënsch, mee all Mënsch muss haut fir déi deier Filteranlage bezuelen.

D'ADR setzt hei un an zwar mat enger sozialer Approche.

Eis Iddi fir all Mënsch fir d'éischt emol 30

Fudder (30.000

Liter) Waas-

ser am Joer

gratis ze ginn

an de Waas-

serverbrauch,

deen doriwwer

eraus geet progressiv

gestaffelt ze taxéieren, mécht genee dat. Dat Gratis-Waasser geet ongeféier duer fir de Verbrauch fir d'perséinlech Hygiene ze decken. Wat elo am Stot nach ufällt fir Kachen a Botze kascht e vernénftege Waasserpräis.

Wien allerdéngs all Dag e Riesegaart netzt (ouni Reewaasser duerfir ze sammeln), wien all Dag Trëttoir, Gaardemauer a viischt Trapp ofsprézt an den Auto wäscht an eventuell och nach eng grouss Schwämm hannert dem Haus huet, muss sech bewosst sinn, datt dee Luxus op d'Waasserrechnung schléit esou bal säi Verbrauch iwwer dem Sockel läit.

- D'ADR setzt sech a fir de Bierger!
- D'ADR denkt an handelt sozial!
- Bei der ADR geet d'praktesch Approach iwwer all blann Ideologie.

D'ADR ass géint Dirigismus iwwert de Portmonni: Mir sinn do fir dem Bierger ze hëllefen, an net fir de Bierger mat deieren Taxen ze strofen. Mir halen eis net fir de d'Schoulmeeschter vum Land ... an ënnerscheiden eis domat vun allen anere Parteien.



## D'Regierung reift sech d'Hänn!

Ass lech eigentlech opgefall, datt de ganze Summer, an elo nach bis an den Hierscht iwwerhaupt net vun eiser Regierung geschwat ginn ass? Bei hirem Belëiftheetsgrad wäert Gambia doriwwer awer och net rose sinn. Esou Gemengewale sinn dach och d'Geleeënheet, fir Gambia ze weisen, wéi beléift d'Regierung ass.

Tatsächlech steet d'Regierung och an dese Gemengewalen zur Wiel: Et sinn déi nämmlecht Parteien, déi d'TVA erhéicht hunn, déi an de leschte Joren ënner ecological Virwänn och un de Gemengentaxe gedréit hunn, bis vill Leit et bal net méi packen.

Et ass déi nämmlecht Regierung, déi op Wuessstem schwiert, an deenen hir lokal Politiker d'Infrastrukturen net méi an der Rei gehale kréien a keng bezuelbar Wunneng an hirer Gemeng kënnen presentéieren. Wann d'Gemengen am Verkéier erstécken, läit dat un deem Wuessstem, deen d'Regierungspartei mam bloe Finanzminister a mat de Gambia-Lokalpolitiker an der Chamber feiern. An de gréngen Transportminister kritt de Chaos net an de Grëff.

Et ass d'Gambia-Regierung, déi d'Stied forcéiert, ëmmer méi Awunner ze hunn an och dat leschte Stéck Gewan zouzebauen fir méi Suen ze kréien. Net nëmme schued d'Politik de Landgemengen, mee si mäsch d'Hauptstad an d'Gemeng ronderëm an och grouss Südgemengen, well si wuessen, obwuel déi haut schonn éischter zevill Awunner hunn, wéi net genuch.

Wann also DP, LSAP an Déi Gréng lech dat Blot (oder dat Rout oder dat Gréngt) vum Himmel versprechen oder sech iwwert den Zoustand an der Gemeng bekloen a soen, si kéinten awer net duerfir, denkt drun, datt si an hir Parteien an der Chamber déi Politik matdroen, déi hei am Land d'Problemer mécht!

## Matschaffen! Froen? Ureegungen!

Hutt Dir Froen oder Ureegungen oder wëllt Dir bei ons aktiv matschaffen, dann zéckt net a rufft un, ënner der Nummer:

**+352 26 20 37 06**



### Walprogramm (Lëtzebuergesch)

- [https://adr.lu/alternativ\\_2017\\_l/](https://adr.lu/alternativ_2017_l/)

### Wahlprogramm (Deutsch)

- [https://adr.lu/alternativ\\_2017\\_d/](https://adr.lu/alternativ_2017_d/)

### Programme électoral (Français)

- [https://adr.lu/alternativ\\_2017\\_f/](https://adr.lu/alternativ_2017_f/)

### Election program (English)

- [https://adr.lu/alternativ\\_2017\\_e/](https://adr.lu/alternativ_2017_e/)

### Programa eleitoral (Português)

- [https://adr.lu/alternativ\\_2017\\_pt/](https://adr.lu/alternativ_2017_pt/)





## Eng jugendlech Gemeng

D'Drogeproblematik bei der Jugend bleibt leider aktuell. Si stellt sozial an och gesondheetlech fir de Beträffenen, fir seng Famill a säin Ëmfeld e grouse Problem duer.

D'ADR setzt sech dofir an, datt d'Gemeng e spezielle Service schaaft, deen déi betraffe Jugend opfängt. Dëse Service soll eng diskret Ulafstell bidden, wou betraffe Jugendlecher an hiert Ëmfeld sech kënnen beroden an hëllef loossen. Mir wäerten och Selbsthëllefgruppen an der Gemeng fërderen a probéieren, hinnen esou diskret Versammlungsméiglechkeeten wéi méiglech ze ginn.

Mir suergen dofir, datt et en aktiivt Jugendhaus gëtt, wou Jonker sech entfale a beschäftege kënnen, mat Hëllef vun Educateuren, wa si dat wëllen.

## Schluddregkeeten an der Gemeng

Eis Gemeng huet gäre grouss Bling-Bling-Projeten. Awer eng Gemeng muss och op de klengen Detail kucken an hire Bierger d'Liewen esou agreabel wéi méiglech maachen. An dat ass hei zu Beetebuerg nach laang net ëmmer de Fall. Beispiller gëtt et genuch.

**Z**u Hënchereng féiert eng Bréck an d'Gewan. Wie sech do op d'Glänner verléisst, soll gutt oppassen. Dat hält nämmelech beim Opgang vun der Bréck op. Do ass séier ee gefall.




**O**ch am Jacquinotspark fënnt ee gelungen Zoustänn. Zouen Toiletten a Knaschtecker an den Trape vum Kiosk suergen net grad fir en heemelecht Gefill bei deene Leit, déi hei e bëssen Entspannung sichen.



**G**rad e Kierfecht misst jo aus Respekt besonnesch propper gehale ginn. Dat ass awer net ëmmer de Fall. Eist Bild vun Hënchereng ass vum Summer. Et war also net esou, wéi wann d'Hierschtblieder schonn um Buedem geleeën hätten. Oder waren ët nach déi vum Hierscht virdrun?

**V**andalismus ass näischt Schéins. Mee wann eng Stroossendeko mutwëlles futti gemaach gëtt, kann eng Gemeng déi traureg Reschter net leie loossen, bis een net méi erkennt, wat emol do war ... wéi an der Lentz-Strooss.



## De Rettungsdéngscht a sécher Gebaier ...

D'ëffentlech Ariichtunge vun enger Uertschaft kënnen Schutz bidden an zur Sécherheet bäidroen, wa si bestëmmte Konditiounen erfëllen. Dowéinst setzt sech d'ADR an der Gemeng dofir an, datt

- urban Miwwelen (Busarrêten, Bänken asw.) op ëffentleche Plazen op eng Manéier ugeluecht sinn, déi weder donkel Gestalten nach Vandalen ulackelen
- ëffentlech Gebaier, (d'Gemeng, d'Schoulen, asw.) duerch technesch Moosname wéi Alarmanlagen oder duerch d'Präsenz vu Personal geschützt ginn
- Och de Rettungsdéngscht spillt eng Roll bei der Sécherheet. Oft si Mënschen an Noutfäll – wou et net seelen ëm Liewen an Dout geet – op hir Präsenz a qualifizéiert Hëllefsléistungen ugewisen. Eng national Reform vum Pompjees-

a Rettungswiesen ass amgaang, iwwer d'Bühn ze goen.

D'ADR begréisst déi grouss Prinzipie vun dëser Reform, awer mir maachen eis och staark dofir, datt:

- d'Gemeng hei net u Responsabilitéit verléiert, andeems eng ganz Rei vun de Gemengenaufgaben op den nationale Plang iwwerdroe ginn
- d'Pompjeesveräiner an deenen eenzelen Dierfer a Quartieren bestoe bleiwen, fir weiderhi méiglech vill Fräiwëlleger am Rettungsdéngscht ze hunn dës lokal Kräfte Ënnerstützung kréien, fir Aktivitéiten an der Gemeng ze organiséieren

Pompjees- a Rettungswiese si fir d'ADR e wichtege Bestanddeel vun der lokaler Sécherheet. Dofir sollen dës Kräfte déi néideg Ënnerstützung kréien, fir sech beschtméiglechst organiséieren ze kënnen.



Ronderëm d'Gare vu Beetebuerg mat hirem grouse Parking an hiren Ënnerféierungen ass vill ze soen, wat d'Sécherheet vu Foussgänger (besonnesch am Däischteren) ugeet.

## Wat sinn d'Alternative fir Är Gemeng?

Mir stellen an der Gemeng déi richteg Froen: Wat notzen zum Beispill déi bescht Reglementer, wann net genuch Police d'Sécherheet ka garantéieren?

D'ADR ass och géint d'staatlecht Ariichte vu Flüchtlingsfoyeren, ouni datt d'Gemeng an hir Bierger gefrot ginn. Beim Wunnensbau weess d'Gemeng besser wéi de Stat, wou séier ka Wunraum geschaf ginn.

D'Gemeng ass do, fir hire Bierger d'Liewen einfach ze maachen. Un d'Beruffs- a Privatliwwen ugepassene Öffnungszäiten, "Guichet unique"-Funktione fir staatlech a kommunal Froen an Internet-Interaktivitéit sinn do néideg.

Op de Gesondheetsniveau iwwerdroen: Eng ADR-Gemeng wäert Drock maachen fir mat regionalen Dokteschhaier (an hiren Hausapdikten) eng zäitgeméiss Versuergung, déi de berufflechen a familiäre Besoine vun de Bierger entsprécht, ze organiséieren.

D'Gestioun vun de Gemeengefinanze „en bon père de famille“ heescht, datt Kreditter just fir konkret In-

vestitioune opgehall ginn.

Et ass net un der Gemeng, z. B. iwwer intelligent Compteur, den Energiekonsum vun hire Bierger auszespionéieren.

Realistesche Klimaschutz ass eng Gemeengeprioritéit: D'Nodeeler vun erneierbaren Energien – Kaméidi, Ästhetik, Schied an der Natur, finanziell Auswierkungen – dierfen net op de Bierger oder Betriber ofgewänzelt ginn.

D'Gemeng ass awer net do fir hir Bierger duerch héig Taxen ze zillen oder duerch eng Verknappung vu Parkplätzen, onsënneg Reglementer an aner Schickanen um Autofueren ze hënnere.

D'Gemeng soll beim Erhale vu wäertvoller Bausubstanz hëllef, an net d'Renovéieren an d'Baue mat iwwerspëtzte Reglementer onméiglech maachen.

D'ADR verdeedegt de Choix vum Bierger an deem säi Recht, säi Liewen an eventuell säi Betrib no beschtem Ermoossen ze féieren.



## Ondemokratesche Schäfferot suergt fir Walskandal



Véier Parteie seene sech beim Buet an déi aner kënnen kucken, wou si bleiwen.

Komesch demokratesch Iddien huet de schwaarz-blo-gréng Schäfferot hei zu Beetebuerg, an och déi rout Opposition mësch mat. Hat net de schwaarze Buergermeeschter a senger Parteifunktioun scho verlaude gelooss, datt hie keng Regierungskoalitioun mat der ADR géng wëllen ... iwwer e Joer virun de Chamberswalen, bei deene kee weess, ob d'CSV iwwerhaupt an d'Regierung kënn? Wuel fir seng gréng Kumpanen an der Gemeng ze schounen?

En anere Schachzuch ass nach manner demokratesch: Bei Wale gëtt nawell am ganze Land penibel drop opgepasst, datt all Partei gläich behandelt gëtt. Am ganze Land? Mee net zu Beetebuerg!

Do gonne sech déi véier Parteien aus dem Gemengrot extra gratis Reklam an den zwou Ausgabe vum Gemenge-Buet („Eise buet.“ 03 a 04/2017). Dat Blat gëtt natierlech ganz vun Ären Taxe bezuelt a kascht déi Parteie kee Su.

D'ADR, déi zu Beetebuerg mat enger kompletter Lëscht an d'Gemengewale geet, war den Häre wuel net fein genuch. Eis Partei gëtt diskriminéiert a kritt keng Säit an „hirem“ Buet fir sech virzustellen. Duerfir brénge mir Iech des Publikatioun heem an d'Boîte: Déi ass selwer bezuelt a selwer ausgedroen, ouni dem Steuerzueler op der Täsche ze leien an ouni d'Gemeng een Euro ze kaschten.

An och wann d'Tageblatt de 25. September schreiw, vun der ADR-Sektioun Beetebuerg hätt kee reagiert op hir Ufroen, ass dat net richtig: Fir hir Presentatioun vun der Gemeng Beetebuerg hu si eng Stellungnam kritt a si waren och a Kontakt mat der ADR. Mee Ufro a Publikatioun vum Artikel waren ze knapp fir eis Äntwert, déi de 25. fäerdeg war.

A propos selwer ausdroen: Mir hunn och e Pefferkär geschriwwen, deen hätt solle vun der Post verdeelt ginn. Anscheinend huet awer net all Stod vun der Gemeng déi flott Publikatioun kritt. Dir kënnt des awer hei nach noliesen:

[https://adr.lu/wp-content/uploads/2017/09/gw\\_pk1\\_beetebuerg-ilovepdf-compressed.pdf](https://adr.lu/wp-content/uploads/2017/09/gw_pk1_beetebuerg-ilovepdf-compressed.pdf)

## Een neie Flair fir Beetebuerg

D'ADR-Sektioun Beetebuerg trëtt u mat frëschem Elan, fir der Onzeffridenheet zu Beetebuerg an an den Uertschafte Fenneng, Hënchereng, Nierzeng an Obeler Ausdrock ze ginn.

Mir hätten gär en neie Flair an d'Gemeng Beetebuerg.

Mir wëllen, datt nei Projekte gutt duerchduecht ginn, mat Léift zum Detail.

Mir wëllen eng propper Gemeng, mir wëllen eng Gemeng, wou d'Verkeiersreegele fir all Mënsch sinn a mir wëllen eng Gemeng, wou net fir vill Suen e „Shared Space“ geschaf gëtt, deen d'Vitesse vun den Autoe net bremst, a wou duerno och nach bëlleg Blummendëppen dragesat ginn.

Mir wëllen, datt d'Gemengeninfrastrukture behënneren- a senioregerecht ëmgebaut ginn.

Mir setzen eis a fir d'Integratioun duerch d'Lëtzebuerger Sprooch, fir gratis Sproochecoursen (eventuell mat enger Aschréiwungstax, déi beim Deelhuelen un deene Coursen zrëckbezuelt gëtt).

Mir fuerdere bezuelbare Wunnraum fir d'Awunner vu Beetebuerg un éischter Platz.

Mir si fir d'Ophuele vu Flüchtlinge mat Verstand, esou datt keng Ghettoe entstinn a si sech bei eis wëllkom fillen.

Mir wëlle méi Gratistransportméiglechkeete fir déi Jonk vun den Dierfer an d'Jugendhaus zu Beetebuerg.

Mir géinge méi strikt oppassen, datt am Cent-Buttek déi Leit sech mat dem Néidegste versuerge kënnen, déi dorop en Urecht hunn.

Mir si fir e Park-&-Ride-System fir an de Beetebuerger Park mat enger Navette vun 9 - 19 Auer.

Mir verlaangen d'Afféierung vun enger Parkvignette, fir dem Parkproblem an de Stroosse vu Beetebuerg Meeschter ze ginn.

Mir wäerten „Domotik“-Systemer installéieren, déi den

Energieverbrauch an öffentleche Gebaier kontrolléieren.

Mat eis ginn all Stroossen zu Beetebuerg gutt ënnerhalen.

Mir setzen eis intensiv fir déi Jonk an d'Familljen an der Gemeng Beetebuerg an.

D'ADR Beetebuerg wëllt sech och fir ee méiglecht Parkhaus bei der Beetebuerger Gare staark maachen, fir vill Autoen aus de Wunnquartieren erauszekréien.

D'ADR Beetebuerg wëll konsequent géint dat wëllt Parken op Gréngzonen an op Trëttoir virgoen.

D'ADR Beetebuerg wëll sech fir ee gratis Citybus duerch déi gaanz Beetebuerger Gemeng asetzen.

D'ADR Beetebuerg setzt sech konsequent fir d'Kontroll vun de Schwéiertransporter duerch Beetebuerg an.

D'ADR Beetebuerg setzt sech fir eng begrenzte Parkdauer bei de Kierfecher an der Gemeng an, duerch d'Afféierung vu Parkauere mat enger Parkdauer vu maximum 1-2 Stonnen.

Mir si fir d'Schafe vun enger Hondswiss a fir d'Reduziéierung vun den Hondstaxen op ee Minimum, a wa méiglech fir hir komplett Ofschaffung. Och soll déi Tax iwwerdrobar sinn, wann ee Mupp stierft, esou datt d'Tax net eng zweet Kéier am Joer fälleg gëtt.

Mir wäerten eis fir eng méi sécher Unterföhrung bei der Beetebuerger Gare staark maachen.

Mir wäerten eis dofir asetzen, datt Zougangsweeër fir Léit mat engem Handicap ugeluecht ginn an öffentlech Toilette bei d'Beetebuerger Gare an déi verschidde Bushaltestellen kommen.

Mir wëllen eis fir méi Tourismus zu Beetebuerg asetzen, dofir si mir fir d'Opmaache vun engem Camping an och fir Fräizäitgeleeënheete wéi verschidden öffentlech Grillplazen.

## Eise Kommentar

Véier Parteien deele sech d'Muecht zu Beetebuerg a si verdroe sech nawell gutt. Laang Zäit war d'LSAP eleng um Rudder. Dunn hunn déi aner dräi sech zesummegeedoen an d'LSAP huet mussen an d'Opposition goen. Mee et verdréit ee sech gutt zu Beetebuerg, a wann de Lorry dem Roby seng Photo ënnert d'Schlofzëmmerfënster hänkt, da gëtt ge-laacht a gegeckst.

Just, wann eng fënneft Partei et wot, eng Lëscht ze presentéieren, dann ass et eriwwer mat der Freed zu Beetebuerg. Wéi kleng Kanner an enger Sandkaul motzen dann déi véier Parteien. D'ADR wëlle si net an enger Koalitioun am Schäfferot, heescht et wéi aus engem Mond. A Reklam maachen soll d'ADR och just aus hirer eegener Täsche: D'Gemengesue fir de Buet si just do, fir datt déi véier al Parteie gratis Reklam fir sech maachen.

Dat ass net demokratesch, well natierlech muss all Partei bei de Gemengewalen, déi nammlecht Chancen hunn.

Grad esou ondemokratesch ass et, scho virun de Wale festzeleeën, mat wéi enger Partei een eng Koalitioun mécht a mat wéi enger net. Well et ass um Wieler ze decidéieren, wien hie gär an der Verantwortung als Buergermeeschter an als Schäfte gesäit, an no deem Wonsch solle sech d'Parteie riichten. Den aktuelle Beetebuerger Buergermeeschter war ausser sech, wéi Gambia (no demokratesche Walen) seng CSV net mat an d'Regierung geholl huet.

Mee et steet och néirens geschriwwen, datt an der Beetebuerger Sandkaul alles géng demokratesch zougien. Wat hunn CSV, DP, Déi Gréng an LSAP ze verstopen, datt si mat aller Muecht wëlle verhënnern, datt eng ADR hinnen op d'Fanger kuckt?

## Eng Gemengefal um Trëttoir

D'ADR ass fir eng seniore- a behënnertefrëndlech Gemeng. All Ustrennung an déi Richtung ass duerfir gutt, mee heindsdo muss een awer de Kapp rësele, wéi esou Initiativen an de Sand gesat ginn.

Fir Leit, déi net gutt gesinn, gëtt et Markéierung fir op den Trëttoir. Déi si schnéiwäiss an och geradderegt wéi Lego-Steng, fir datt se e Geräisch maachen, wann ee Mënsch mat engem Blannebengel driwwer fiert. Eng gutt Hëllef fir déi Leit, déi op gutt Hëllef ugewise sinn fir mobil ze bleiwen.

D'Beetebuerger Gemeng huet och esou Markéierungen maache gelooss. Wann des allerdéngs schnouerriicht op eng Zëtär hiféieren, wou ee ka falen (oder mat sengem Bengel hänke bleiwen), ass dat keng Hëllef mee eng Fal, wéi an der Collart-Strooss.



Bravo Gemeng Beetebuerg fir des Fal an der Collart-Strooss.



**Lëscht 5**



**Ahles Fernand**  
46 Joer, Beetebuerg,  
Geschäftsmann



**Blasen Edouard**  
75 Joer, Beetebuerg,  
Pensionéiert



**Eisenlöffel Guy**  
47 Joer, Beetebuerg,  
Staatsaarbechter



**Feltz Micheline**  
70 Joer, Beetebuerg,  
pensionéiert  
Geschäftsfra



**Flammang Pascal**  
52 Joer, Näerzeng,  
Manager vun enger  
Bank



**Hermann Fabrice**  
22 Joer, Beetebuerg  
Germanistik-Student



**Klein Klaus**  
56 Joer, Beetebuerg,  
Usträichermeeschter



**Koehler Camille**  
71 Joer, Hënchereng,  
pensionéierte  
Gemegefouctionnaire



**Koehler Pierrette**  
47 Joer, Hënchereng,  
Sekretärin



**Kohn Patrick**  
49 Joer, Beetebuerg,  
Eisebunner



**Kopp Pierre, genannt Pit**  
52 Joer, Hënchereng,  
Magasinier



**Schneider Gérard**  
50 Joer, Beetebuerg  
IT Service Manager



**Stehmeier-Ruppert  
Marianne**  
55 Joer, Beetebuerg,  
Ersatzpersoun an  
enger Crèche



**Stirn Tanja**  
37 Joer, Beetebuerg,  
Fräiberuffler



**Storck Stéphanie**  
29 Joer, Näerzeng,  
Usträicher-Dekorateur